

# UF DE BÜHNI VOM LÄBE

Lampenfieber - "nicht ich sein", T/M: D. Liauw

*Anfang:*

Uf de Bühni vom Läbe, do simmer no Chind,  
göhdn täglich id Schuel, ässed s Znüni ganz gschwind,  
händ Logo und Tanze und Volleyverein,  
denn hämmer no Ufzgi, isch das ned gemein?  
D Klavierstund isch immer am Mäntig am drü,  
denn ruumi im Mami de Gschirrspüeler i,  
muess s Meersäuli mischte, in Coop füre goh,  
und früeh gnueg is Bett, susch mag ich ned ufstoh.

Ich wär hie und da gern en andere Mänsch,  
en Star wo d vom Fernseh uf Ahieb erkännsch.  
Vielleicht au e Gschäftsfrau mit Business und so,  
denn hätt i vill Gäld und wär glücklich und froh.  
Vielleicht wär ich aber au lieber Pilot,  
en Fischer am See mit 'me eigene Boot.  
Mir laded eu alli i - träumed doch mit!  
Und stuned mit eus, was's us eus alles git!

*Ende:*

Ich bin e Gschäftsfrau gsi,  
ich ha ganz en Huufe Gäld verdient debii.  
Bi jede Obig fix und fertig gsi,  
ha chum me Freizit gha.  
Söll itz das mis gröschte Ziil gsi sii,  
wo'n ich im Läbe ha?

E Chrankeschwöschter z si,  
isch min Traum als chlises Meitli immer gsi.  
Nur gsehn ich s jetz nümm ganz so positiv,  
s isch stressig im Spital.  
Ich glaub ich wär vill lieber Detektiv,  
das wär die bess'ri Wahl.

Im Restaurant han ich  
welle gseh öb das es Läbe wär für mich.  
Ich ha serviert inere grosse Beiz,  
ha gschafft tagus, tagii.  
Sis eigne Gäd z verdiene het sin Reiz,  
doch isch das alles gsi?

Als alti Lehrerin,  
han i gwüsst, dass ich e schaurig strängi bin.  
Ich ha de Chind en Huufe'n Ufzgi geh,  
ha gschumpfe hie und da.

De Bruef macht unbeliebt, drum wott ich de  
in Wirklichkeit ned ha.

Im eigne Atelier,  
het jede mini tolle Kunschtwerk chönne gseh.  
Wemmer bewundred wird, tuet eim das guet,  
das goht doch allne glich.  
Doch was mir fehlt, wenn ich en andre bin,  
das isch mis ächte "ich".

Uf de Bühni vom Läbe, do simmer no Chind,  
was mir aber vor grossem Publikum sind,  
das töfemer wähle, mer suecheds eus us:  
en Clown, e Prinzässin, e riesigi Mus.  
Und doch gits e Rolle, die passt eus ganz guet.  
Ich muess ned meh chönne, ich bruch ned z vill Muet.  
Und wenn s mängisch schwierig isch, mir isch das gliich,  
am liebschte vo allem bin ich eifach ich.